

25 AUG 1997

Brunei-tiba

SULTAN BRUNEI TIBA UNTUK LAWATAN EMPAT HARI

KUALA LUMPUR, 25 Ogos (Bernama) -- Sultan Brunei, Sultan Hassanah Bolkiyah tiba hari ini untuk lawatan empat hari bertujuan mengukuhkan lagi hubungan dua hala.

Ketibaan baginda di Lapangan Terbang Sultan Abdul Aziz Shah bersama Raja Isteri Pengiran Anak Hajah Saleha dan Pengiran Isteri Hajah Mariam serta anggota keluarga diraja lain, disambut oleh Perdana Menteri Datuk Seri Dr Mahathir Mohamad dan Datin Seri Siti Hasmah Mohd Ali.

Yang turut hadir ialah Menteri Luar Datuk Seri Abdullah Ahmad Badawi dan Menteri Pertanian Datuk Amar Dr Sulaiman Daud selaku menteri pengiring.

Rombongan diraja itu juga mengandungi beberapa menteri, pegawai kanan dan usahawan.

Lawatan itu ialah sebagai membalas kunjungan Yang di-Pertuan Agong Tuanku Ja'afar ke Brunei pada September tahun lepas. Kali terakhir Sultan Hassanah Bolkiyah membuat lawatan negara ke Malaysia ialah pada 1992.

Sambutan rasmi untuk baginda berlangsung di Medan Parlimen.

Ketibaan baginda bersama Raja Isteri dan Pengiran Isteri di Medan Parlimen disambut oleh Yang di-Pertuan Agong Tuanku Ja'afar dan Raja Permaisuri Agong Tuanku Najihah.

Baginda memeriksa kawalan kehormatan oleh pegawai dan anggota Batalion Pertama Rejimen Askar Melayu Diraja sebelum diperkenalkan kepada menteri-menteri kabinet dan anggota perwakilan asing.

Sultan Hassanah Bolkiyah akan menerima menghadap Dr Mahathir di hotel penginapannya di sini petang ini. Pada majlis itu Perdana Menteri akan dianugerahkan Darjah Kerabat Laila Utama Yang Amat Dihormati (DK).

Majlis santapan diraja akan berlangsung di Istana Negara malam ini.

Esok, Sultan Hassanah Bolkiyah yang juga Perdana Menteri, akan mengadakan perbincangan dua hala dengan Dr Mahathir di Jabatan Perdana Menteri.

Atur cara pelawat diraja itu termasuk kunjungan ke Mines Resort di Sungai Besi, stesen televisyen satelit Astro di Bukit Jalil dan menemui masyarakat Brunei di negara ini di Istana Sharif Ali di Jalan Ampang.

Baginda yang juga Menteri Pertahanan akan melawat pangkalan Tentera Udara Diraja Malaysia dan juga Airod di Subang pada Rabu.

Sultan Hassanah Bolkiyah akan menyampaikan ucapan utama kepada tokoh-tokoh perniagaan pada satu jamuan tengah hari selain berceramah mengenai "Asia Tenggara di Hari Esok : Perspektif Brunei" di Institut Diplomasi dan Hubungan Luar di Petaling Jaya.

Timbalan Perdana Menteri dijadual menghadap baginda pada Khamis.

-- BERNAMA

ARA MAI